

- प्रदेशभर मांय सुख-समृद्धि, भाई-चारा अर रोशनी रा पर्व दिवाळी रो उमाव-चारु मेर उजियारा री जगमग।
- प्रधानमंत्री नरेन्द्र मोदी नौसेना रे साथै दीवाळी री खुशियां साझा करी-स्वदेशी युद्धपोत आई.एन.एस. विक्रान्त ने आत्मनिर्भर भारत अर मेड इन इंडिया रो प्रतीक बताया।
- केन्द्र सरकार आपदा राहत अर पुनर्वास सारु 27 राज्यां ने ई साल अजै ताई कोई 13 हजार 600 करोड़ रिप्यां री रकम जारी करी।
- प्रदेश मांय तापमान मांय कमी ऊँ घणकरी ठौड़ां मौसम सुहावणो बण्योड़ो है।

000

प्रदेशभर मांय सुख-समृद्धि, भाई-चारा अर रोशनी रा तिवांर दिवाळी रो उमाव छाया है। लोग कारोबारी ठिकाणा अर घरां मांय लक्ष्मी अर गणेश पूजन री तैयारियां मांय लाग्या है। लोग घर-परिवार अर साथियां रे साथै तिवांरी खुशियां रो आनंद ले रह्या है। चप्पा-चप्पा मांय फैल्यो उजियारो अंधकार माथे प्रकाश री जीत रो संदेश देवे। जठे बजार मोवणी सजावट अर रंग-बिरंगी रोशनी री सतरंगी आभा ऊँ सराबोर है। वठे ई घरां ने दीयां, झालरां, लड़ियां, रंगोली, फूलां अर बंदनवार ऊँ सजायी ज्या है। मिन्दरां अर धार्मिक ठौड़ां माथे मनभावन झांकियां सजाई ज्यी है। संवारा ऊँ ई भक्त सिरधा अर आस्था रे सागे दर्शन सारु पूग रह्या है। बाजारां मांय आज ई दिनभर चहल-पहल री। राजधानी जयपुर रा परकोटा हलका री सजावट अर रोशनी ने निहारण सारु स्थानीय रहवासियां रे साथे ई घणी तादाद मांय सैलाणी पूग्या है। सैलाणी इण ने कैमरां मांय कैद कर ने खुश व्हे रह्या है। उठिने उदयपुर मांय ई सैलाणियां रो हुजूम उमड़्यो है। म्हणा खबरनवीस बतायो के इण ऊँ कारोबारियां मांय घणो उमाव है।

.....

बाड़मेर ज़िला मांय ई रोशनी रा तिवांर माथे उमंग अर हरक रो माहौल है। शहर रे साथै ई गांवांई हलकां ई उजाळा ऊँ जगमगा रीया है। म्हाणा खबरनवीस बतायो के सरहद माथे बीएसएफ जवानां सरहदी चौकियां ने मोवणी दीप माळा ऊँ सजाया है।

.....

दीपोत्सव माथे कानून बन्दोवस्त ने देखता पुलिस टीमां सावचेती ऊँ गश्त कर री है। पटाखां अर आतिशबाजी ऊँ होवण वाळां प्रदूषण ने देखता राजस्थान राज्य प्रदूषण नियंत्रण मंडल अर न्यारा-न्यारा सामाजिक संगठनां कानी ऊँ पर्यावरण अनुकूल अर हरित दिवाळी मणावण री अरज करी ज्यी है। कार्तिक अमावस माथे भगवान महावीर स्वामी ने निर्वाण री प्राप्ति व्ही ही। ई मौके जैन मंदिरां मांय काले मोक्ष कल्याणक दिवस मनायो जायेला। वहीं दीपोत्सव री कड़ी मांय 22 अक्टूबर ने गोवर्धन पूजा अर अन्नकूट रो आयोजन व्हेला। इण रे आगले दिन भाईदूज मनायी जायेला।

000

प्रधानमंत्री नरेन्द्र मोदी गोवा अर कारवार तट माथे नौसेना जवानां रे साथे दिवाळी मनायी। आप रा सम्बोधन मांय श्री मोदी स्वदेशी युद्धपोत आई.एन.एस. विक्रान्त ऊँ देशवासियां ने दिवाळी री शुभकामनावां दी।

वणा कह्यो आई.एन.एस. विक्रान्त आत्मनिर्भर भारत अर मेड इन इंडिया रो प्रतीक है। वणा देश रा सशस्त्र बलां री सराहना करता कह्यो तीनू सेनावां रा तालमेल ऊँ ऑपरेशन सिंदूर पाकिस्तान ने घुटना टेकण माथे मजबूर कर दिया। श्री मोदी कह्यो के राष्ट्र निर्माण मांय सैन्य बलां री घणी मोटी भूमिका है। प्रधानमंत्री कह्यो के अबै चारु मेर स्वदेशी रा मंत्र री गूंज।

.....

प्रधानमंत्री काले आई.एन.एस. विक्रान्त पूग्या। वे नौसेना रा बड़ा खाणा मांय भेळा व्ह्या। वणा सैनिकां साथे बतळ करी अर वां रो हौसलो बधायो। ई दौरान सैनिकां देशभक्ति गीत प्रस्तुत कर्या।

.....

प्रधानमंत्री युद्धपोत ऊँ वॉर ड्रिल ई देखी। ध्यान जोग है के प्रधानमंत्री श्री मोदी हर साल सैन्य बलों रा जवानां रे साथे दिवाळी मनावे है।

000

बारां जिला री अंता विधानसभा सीट माथे होवण वाळा उप-चुनाव सारू नाम-पाना भरण रो काले आखिरी दिन है। अजै ताई 12 उम्मीदवारां कानी ऊँ 17 नामपाना भरी ज्या है। विधानसभा हलका मांय न्यारा-न्यारा उम्मीदवार लोगां ऊँ मिल र दीवाळी री शुभकामनावां दे रिया है। और ब्यौरो म्हाणा खबरनवीस ऊँ—

000

प्रदेश मांय कमती रा सरकारी मोल माथे दाळां अर तिलहन री खरीद सारू काश्तकारां रा रजिस्ट्रेशन री प्रक्रिया दिवाळी तिवांर ने देखता आज अर काले दो दिन टळण रे पछे 22 अक्टूबर ऊँ खुलेला। सहकारिता राज्य मंत्री गौतम कुमार दक बतायो के राज्य मांय मूंग, मूंगफली, उड़द अर सोयाबीन री एमएसपी माथे खरीद सारू पंजीयन री कार्यवाही 18 अक्टूबर ने सरू व्ही ही। श्री दक बतायो के अजै ताई 60 हजार ऊँ बत्ती काश्तकारां रो पंजीयन करी ज्यो है। वणा बतायो के दो दिन टळण रे पछे काश्तकार परसु ऊँ आप री निपज बेचण सारू राजफेड पोर्टल माथे पंजीकरण करवा सके है।

000

नुवा आपराधिक कानूनां रे एक साल पूरो होवण माथे राजस्थान पुलिस कानी ऊँ जयपुर मांय लगायी ज्यी नुमाईश रो काले आखिरी दिन है। सीतापुरा रा जेईसीसी मांय नव विधान-न्याय की नई पहचान थीम माथे चाल री ई हाईटैक प्रदर्शनी ने देखण सारू घणी तादाद मांय लोग पूग रह्या है। पुलिस महानिदेशक, राजीव कुमार शर्मा ई नुमाईश ने देख्या। ई मौके वणा कह्यो के नुवा कानून नागरिक अर पीड़ित केन्द्रित हैं। आ मांय महिलावां अर टाबरां री हिफाजत सारू खास प्रावधान करी ज्या है।

000

केन्द्र सरकार आपदा राहत अर पुनर्वास सारू केई राज्यां ने एसडीआरएफ रा केन्द्रीय हिस्सा री दूजी किश्त एडवांस देवण ने मंजूरी दे दी है। गृहमंत्री अमित शाह साल 2025-26 रे दौरान एसडीआरएफ रे तैत 27 राज्यां ने कोई 13 हजार 6 सौ 3 करोड़ अर एनडीआरएफ रे तैत 15 राज्यां ने 2 हजार 89 करोड़ रिप्यां दिया है। बाढ़, भूस्खलन अर अतिवृष्टि रा असर वाळा सगळा राज्यां ने एनडीआरएफ टीमां अर बचाव कामां सारू आ मदद री रकम मुहैया करायी ज्यी है। इण रे साथै ई राजस्थान समेत हरियाणा अर मध्य प्रदेश ने अग्निशमन सेवावां रा पसारा अर आधुनिकीकरण सारू कोई 9 सौ 3 करोड़ रिप्यां री रकम मुहैया कराई ज्यी है।

000

प्रदेश मांय घणकरी ठौड़ां मौसम सुहावणो बण्योड़ो है। दिन री बगत धूप थोड़ी तेज है फेरु ई उमस अर गर्मी रो एहसास नी है। वठे ई रात री बगत हल्की ठण्ड मौसम ने खुशनुमा बणा री है लारला 24 घंटां मांय सिरोही अर जालौर मांय कमती रो तापमान 15 डिग्री सेल्सियस रे आरे-सारे रियो। वठे ई 15 दूजा शहरां मांय रात रो तापमान 20 डिग्री सेल्सियस ऊँ नीचे दर्ज करी ज्यो। दिन री बगत रो बत्ती रो तापमान बाड़मेर मांय साढे 37 डिग्री सेल्सियस दर्ज व्ह्यो। चित्तौड़गढ़, जैसलमेर, फलौदी अर श्रीगंगानगर मांय पारो 35 डिग्री सेल्सियस ऊँ ऊपर रियो। उठिने, सीकर, झुंझुनूं अर चूरू मांय सांझ-संवारां ठंड री रंगत गुलाबी निजर आवण लागी है। चूरू ऊँ म्हाणा खबरनवीस बतायो के ई बार चोखी बिरखा रे कारण सर्दी बेगी आयी है।

000

झुंझुनूं मांय व्ह्या एक सड़क हादसा मांय दो लोगां री मौत व्हे गयी। हादसो लारली रात अजीतगढ़ गांव कने कार अर ट्रौला री टक्कर ऊँ व्ह्यो। इण मांय तीन लोग घायल व्हे गया। अतिरिक्त पुलिस अधीक्षक देवेन्द्र राजावत बतायो के करण वाळां हिस्ट्रीशीटर हा। अ बावरिया अर मलसारिया गैंग ऊँ जुड़योड़ा हा। बणा बतायो के घटना रे पछे शहर री सुरक्षा व्यवस्था ने ध्यान राखता अतिरिक्त नाकाबंदी करी ज्यी है।

000

प्रदेश मांय काले पुलिस शहीद दिवस मनायो जायेला। ई मौके राजस्थान पुलिस अकादमी मांय खास कार्यक्रम व्हेला। 21 अक्टूबर ने हर साल पुलिस रा वां जवानां ने याद कर्या जावे है। जिण देश

सेवा सारू आप रा प्राणा री बाज़ी लगा दी। ई मौके वीरांगनावां अर शहीद पिरवारजना रो सन्मान कर्यो जावेला।

000

प्रधानमंत्री नरेन्द्र मोदी ई महीना री 26 तारीख ने आकाशवाणी ऊं प्रसारित कर्या जावण वाळा खास कार्यक्रम “मन की बात” मांय विचार बतावेला। आ ई कार्यक्रम री 127वीं कड़ी व्हेला। ई सारू आप ई मुफ्त नम्बर 1800-11-7800 माथे सुझाव भेज सको हो। ई रे अलावा नरेन्द्र मोदी एप अर माय जीओवी ओपन फोरम रे जरिये ई विचार भेज्या जा सके है। इण बाबत् आप 24 अक्टूबर ताई राय भेज सको हो। ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट अर न्यूज़ ऑन ए आई आर मोबाइल एप माथे ई प्रसारित कर्यो जावेला। मन की बात कार्यक्रम रो प्रसारण आकाशवाणी समाचार, डीडी न्यूज़, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई कर्यो जावेला।

000